

蜀

水

經

蜀水經卷之六

京山李 元太初

江水六

江水又東經觀音灘

水駛湍橫行舟以爲至險明萬歷甲辰巡按李時華  
鏤平之黃輝有平險碑記然今之險如故也碑記稱  
豎巖橫梁交環束江江怒而戰灘激巖竦怪石猛鼓  
礧霆立吞戈鋌鱗鱗饑涎波厯舟一無幸立入鮀甕  
江水又東北經鄧都縣城南

有二險灘曰送客堆曰錢碑梁冬涸石骨突露水歸  
漕渠雖揚艇而下無波可駭迨夏水漲漫石磧盡沒  
波浪壯濶一瀉數十里舟人以爲大戒錢碑之險爲  
甚送客次之錢碑梁卽古之海船灘也浪翻如雪波  
急如駛善操舟者望梁而進捩舵稍右以避之仍順  
中流則吉若向左直進與梁相觸則舟碎矣或跨梁  
而入巨浪掀騰則舟覆矣若過趨於右沱水逆激反  
撲而左必有觸梁之慮若錯認送客堆爲錢碑梁而  
先期趨右亦必爲沱水所激游者識之

鄧都縣故枳地也漢永元二年分置平都縣屬巴郡  
蜀漢延熙十七年省入臨江隋義寧二年復置豐都  
縣屬臨江郡唐武德二年分浦州之武寧置南賓縣  
屬忠州宋元豐中廢豐都紹興初復置明洪武初改  
鄧都省南賓入之屬重慶府 國朝雍正十二年改  
屬忠州○華陽國志謂巴子治江州或治平都蓋三  
巴之地臨江皆山自重慶而下宜昌而上絕無平原  
可以建治者獨縣城立平洲之上長可三里許平都  
之名或取諸此山又以縣名也唐乾寧二年荆南節

度使成汭與其將許存沂江畧地盡取濱江州縣武  
大節度使王建肇棄黔州而退保鄧都汭以其將趙  
武爲黔中畱後自黔數攻鄧都建肇不能守遂降王  
建其後孟知祥將朱偓侵涪州武秦帥楊漢賓不能  
守將奔忠州偓追至鄧都而還因取涪州是縣亦忠  
涪之要區也○縣城倚白鹿山山之陽翠微掩映有  
鳴玉泉溪不盈尺不溢不涸響作琴瑟之音清澄玉  
色山麓有流杯溪溪凡七出昔人鑿爲曲水以流觴  
焉蘇詩序曰予至鄧都縣將遊仙都觀縣令李長官

曰固知君之將至也此山有老鹿獵人莫能害之將有客來遊鹿輒夜鳴故以此候之而未嘗失按此白鹿山所由名

江水又東受南賓河南賓河源出湖北利川縣忠路司有三源一出龍嘴山一出瓜子山一出洽箐溪經石砬廳南合流爲三江溪又西北受龍潭水抵廳城北又西受大鳳溪爲漆園河又西受都會溪過萬安山分流中出長洲又合流經下路壩受四農溪又西北受重巖溪又東經斷頭山下金紫洞伏入地中又出而受望涂溪

又北爲葫蘆溪入江

名勝記曰葫蘆溪邃窈莫測蛟龍是宅青螺綠髻上下相映謂之月鏡潭

江水又東北經平都山

七十二福地之一相傳漢王方平陰長生棲隱處五雲洞其遺跡也勝覽曰自縣東行一里許始登山石徑縈迴可一二里平瑩如埽林木邃茂夾逕皆翠柏黃葛殆數萬株有數十株云是千年物鹿麋時出沒林間與人狎段文昌記曰平都山最高頂卽漢時王

陰二真人蟬蛻之所也峭壁千仞下臨湍波老柏萬  
株上挿峯頂靈花綵羽皆非圖志中所載者昏旦萬  
狀信非人境名勝記曰豐民洲在平都山下隋兩取  
之以名縣自豐旁加邑而羅酆地府之說始行真誥  
羅酆山在北方癸地幽州北海中去岸不知幾千萬  
里六天宮是鬼神六天治世有知酆都六天宮門名  
百鬼不敢爲害陶宏景謂是北酆鬼王決數罪人處  
其神卽經所謂閻羅王矣太平廣記東都酆都市在  
長壽寺東北初築市垣掘得古塚土藏無甌甓棺木



陳朽觸之便散屋宇平曠朱衣得銘云箠道居朝龜  
言近市五百年間於斯見矣當時達者參驗是魏黃  
初二年所葬也宋范成大詩洞宮福地古所銘云有  
北陰神帝庭太陰黑簿囚鬼靈則鄴都之說亦不始  
於近代愚按山不甚高無林巒之美無邱壑之邃無  
洞宇之幽而仙家艷稱之五雲洞直下溪黑乃如水  
井有閻羅王祠香火最盛每除夕元旦之交遊燈上  
下如火龍翔舞光曜燭天如白晝以此爲勝景矣水  
經注謂縣有天師治兼建佛寺甚清靈殆始自晉宋

間耶閻羅鬼王本無形質何假華居以爲庇廕其地亦非僻遠陰森之所閻羅何擇而居之靈所照察欲遍寰宇何縣治密邇復有鬼魅凶惡之爲感也噫亦妄矣

江水又北經虎鬚灘

水經注謂江水廣大夏斷行旅今冬涸石露稍有波浪爲阻夏月平江演漾迄無舟警殆古今水勢異長年云北碕彈子石相公島手巾溪小百牽泥沱子竈門子轉棚子竹節三灘大佛面觀音灘筋斗三碛

送客堆瓦子濠鏡碑梁海舫灘鄧都縣共六十里龍  
床石葫蘆溪豐稔壩關石灘菱角腦冲天漕麻碯漏  
關子珍珠簾三官子麻滄灣高家鎮老蛇溪丁溪鯉  
魚沱鑿硃碯九流子虎鬚灘鳳凰子花林驛共六十  
里按鏡碑梁著名之險也觀音灘次險

江水又東北經唐土洲

洲在江中長里餘夏漲則沒碑目曰唐土州有貞元  
十七年段文昌撰耆老思舊碑唐刺史房公式善狀  
碑

江水又東受鳴玉溪

鳴玉溪俗名西溪長溝逶迤亂石錯雜高則爲瀑低則爲潭聲如佩玉之鳴兩岸皆峻嶺林木森茂產木蓮土人呼黃心樹大者高五丈入冬不凋身如青楊有白文葉如桂厚大無脊花如蓮香色艷麗皆同獨房蕊有異溪上有懸巖瀑布高五十餘丈潭洞深邃古木蒼然其對岸屏風山有唐陸宣公墓初歿藁葬於此後歸葬嘉興而此爲虛塚也勝覽曰子美歸葬偃師而未陽之墓自若太白移殯青山而采石之塚

猶在則宣公此墓宜封植之矣宣公名贇字敬輿  
李人唐中書侍郎平章事因論裴延齡奸佞貶州別  
駕

江水又東北經忠州城南

忠州故臨江也漢置屬巴郡梁大同六年置臨江郡  
魏廢帝三年置臨州隋開皇廢郡大業廢州以縣屬  
巴東郡義寧二年復置臨江郡唐武德元年復爲臨  
州貞觀八年改忠州天寶改南賓郡乾元復故屬山  
南東道宋爲忠州南賓郡宋乾德六年置龍渠鎮開

寶二年置南賓宣慰司咸淳元年以度宗潛邸升爲  
咸淳府置龍溪縣元復爲忠州至元二十一年屬重  
慶路明洪武初省臨江入之 國朝雍正十二年改  
直隸州○忠之名以巴蔓子或云嚴顏蔓子者巴國  
將軍也巴有難請師於楚許以三城楚王赦巴巴國  
既定楚師請城蔓子曰藉楚之靈克弭禍難誠許楚  
王城將吾頭往謝之城不可得也乃自刎以頭授楚  
使楚王歎曰使吾得臣若巴蔓子用城何爲乃以上  
卿禮葬其頭巴國葬其身亦以上卿禮又三國時劉

璋使嚴顏守巴郡爲張飛所擒欲降之顏曰有斬頭將軍無降將軍飛怒命斬之顏從容曰斫頭便斫頭何必怒耶縣西北一里有蔓子塚西南二十里有嚴太守碑蘓子瞻詩嚴子獨何賢談笑傲碁几子由詩相傳昔者嚴太守獨憶城破節最高皆稱嚴顏不稱巴蔓子也又陸放翁詩云雲連江岸屈原塔花落空山夏禹祠則屈原亦得以忠著於州矣○黃山谷忠州復古記曰白樂天在州東樓以宴賓佐西樓以瞰鳴玉溪登龍昌寺以望江南諸山張樂巴子室以會

竹枝歌女東坡種花東澗種柳皆相傳識其故處焉  
按白居易劉晏李吉甫皆刺忠州宋紹聖四年知州  
王闢之建四賢閣祀劉李白陸四賢也

江水又東北受滄溪源出梁山縣南觀音巖西經金雞  
山南會衆流爲水磨河又東經三角灘受黃金灘之水  
又東南經滄井又南入江

滄井產鹽水經注所謂鹽井溪水沿注江者鹽細白  
如麴而味甘井寬厰如家井下處溪濱夏月溪漲淡  
水滲滿漲退取煎如故不以淡水壞鹽也華陽國志



曰臨江軍之鹽涂二溪一郡所仰唐書曰塗淦監漁  
陽監鹽官二屬南浦縣按淦卽今之淦溪也

江水又東北經黃華城

水經注曰江水東得黃華水口左逕石城賓宇記曰  
石城在臨江縣東八里岷江北岸巴西郡寄理於此  
城四面懸絕亦謂之巴子城矣宋淳祐十年六月黃  
華洲石出雙魚安原白作金魚堡記云雲中常侯守  
皇華於朝天門外建大堡忽有石破隱出雙魚鱗鬣  
悉具

江水又東北受涂溪

涂井亦鹽井也井神爲漢楊伯起相傳伯起刺荊州時溯江憇州之南城候得江北二三里間有寶氣至蟠龍洞見柱下史丹爐曰此地有龍無虎其丹不就至涂山見白鹿飲泉曰寶氣在此矣土人從所指處鑿盤石得鹽泉焉

江水又東北經折魚灘

灘在州東三十里石嘴入江其勢衝激魚不得上往往折回故名折魚俗名折尾林夏月水平如鏡波浪

不驚冬月水落大石突出橫亘江心舸艦上下緣石  
曲折其勢迅激往往觸碍卽不救也石下有洞吞水  
令滿則潰出潰已復吞當其潰時舟過必壞說者謂  
有大紅魚爲害州收取古寺舊鐘磬投之遇其吞潰  
之勢沙泥漸淤其害稍弭石上有大碑書對我來三  
字令操舟人望碑而進庶無觸碍

江水又東北受漕溪漕溪源出梁山縣東蟠龍山南流  
爲袁溝又南經石寶山下入江

蟠龍山有二石龍首尾相盤旁有潰霧巖洞水下注

約垂二百餘丈范石湖以爲天下瀑布第一相對有  
飛練亭東坡易名飛雪亭明嘉靖壬辰獲白兔巡撫  
宋滄表進禮部尙書夏言請獻宗廟作頌以進因建  
白兔亭於飛雪亭之左器物譜曰石寶山一石突高  
三四丈餘根狹小旁有一孔如盂通明其頂相傳有  
米出其中日可食一人或以冗穢米遂絕亦誕語  
長年云花林驛羊渡溪魚硎三角濠野貓汧白沙沱  
檢子沱孟梁烏牛灘白馬灘唐土碕高陰碕勾連磧  
滑石忠州共六十里菜園沱獨樹林拖板槽東溪響

珠林半江砮三奶石打磨林黃華城舊州官溪渡油  
光砮簾箕石折尾林穿心濠淹湊林墻溪鷺鷥砮哨  
兵磧阡磧石寶寨清溪驛共九十里按魚洞折尾二  
灘著名之險也滑石極險鑿硃背鳳凰子次險

江水又東經石砮府北西界沱

兩山相束亦謂之石鼓峽水經注曰江水東經界灘  
是地巴州之西界益州之東界

石砮廳故武寧縣地也唐武德二年分置南賓縣隸  
忠州明廢南賓入酆都 國朝乾隆二十七年置石

砭同知直隸川東道○宋建炎初馬援三十九代孫  
馬定虎平蠻有功分南賓地置石砭安撫司世襲以  
其地有石潼砭蒲二關也明洪武八年以馬克用功  
改宣撫使天啟元年以秦良玉功陞宣慰使秦良玉  
者土司馬千乘之妻字貞素忠州秦葵之女萬歷間  
從千乘征播州楊應龍爲戰功第一督臣李化龍匿  
不以聞因開礦忤內監構千乘下獄瘐死而良玉以  
子幼得領司職以白桿兵名天下天啟中良玉援遼  
加二品服還蜀破蘭賊奢崇明封夫人授都督僉事

充總兵官崇禎間破安邦彥於貴陽敗張獻忠於太平扼羅汝才於巫山因楊嗣昌驅賊入蜀袁捷春不守遂至蜀陷而良玉堅壁不出矣順治戊子卒年七十有五子祥麟屢從征戰有功先良玉卒其兄都司僉書秦邦屏戰沒於澤河其弟副總兵秦民屏戰沒於大方其子婦張鳳儀逐流賊王嘉沒於侯家莊皆可紀也

江水又東北經武寧磧

後周之武寧縣治也俗稱烏林磧唐王周過縣詩曰

岸迴驚水急山淺見天多

江水又東北經壤塗受壤溪

江水又東北經湖灘

在葛縣西六十里春夏水泛江面如湖水經注曰江水東逕壤塗而歷和灘峽程記曰四百五十灘有清水重峯湖灘漢灘名勝記曰仰渡驛江中有石似人號湖灘飛瀑湍流勢甚險急杜詩不是怕湖灘者此矣

江水又東北受楊河溪



水經注曰江水又得將龜谿口卽此水

江水又北受白水溪

水經注曰江水東會南北集渠南水出涪陵縣界謂之陽溪北流逕巴東郡之南浦僑縣西溪峽側北流注於江謂之南集渠口亦曰於陽溪口卽此水也

江水又北經峩眉磧

水落石出磧形如眉多細石色斑可以遊戲每正月七日士女至磧上作雞子卜擊小鼓唱竹枝歌

江水又北經黃金灘

卽千金島也在縣南二里近南岸屹立江心高數丈  
廣百步土人淘金於此亦名黃金島

江水又西北經萬縣城西南受芴溪芴溪源出高梁山  
南經獅子山又東南經天生橋入江

水經注曰北水出新浦縣北高梁山分溪南流逕其  
縣西又南百里至胸腮縣南入於江謂之北集梁別  
名班口又名分水口名勝記曰分水驛在縣東西八  
十里此水由天生橋而出方輿勝覽曰天生橋在州  
西芴溪上乃一巨石自然成橋長與溪等平潤如履

平地溪流出其下矣

萬縣故羊渠縣也漢置屬固陵郡蜀漢建興八年改南浦縣魏廢帝元年改魚泉後周置安鄉郡又置南州南都郡源陽縣建德四年改魚泉爲安鄉縣源陽爲武陵縣安鄉郡爲萬州郡南都郡爲懷歸郡隋廢州郡以縣屬信州開皇十八年改安鄉爲南浦縣唐武德二年置南浦州八年州廢以縣屬夔州九年復置貞觀八年改萬州天寶爲南浦郡乾元復故屬山南東道宋爲萬州南浦郡屬夔州路元至元十二年

省南浦入萬州明洪武七年改縣省武寧入之○縣  
南隔江有岑公洞勝覽曰在大江之南廣六十餘丈  
深四十餘丈石巖盤結如華蓋左右方池有泉湧出  
巖簷遇盛夏注水如簾松篁籐蘿薜蘿蒼翠真神仙  
窟也圖經曰岑公名道願本江陵人隋末避地隱此  
巖下百餘歲肌膚若冰雪積二十年尸解去

江水又折而東受李牌溪

水經謂之汜溪

江水又東受周溪

碑目曰唐僧圓澤傳碑在周溪大江之濱三生石旁  
蘇封可見者咸通三年壬子歲十一月建名勝記曰  
溪在縣東四十里忠誼傳載李源道人三生事東坡  
以爲卽圓澤也洛師惠林寺僧與李源善約游青城  
舟次南浦見孕婦澤亡而婦乳後十三年至杭州天  
竺寺見牧童扣角而歌卽澤也按圓澤事出袁郊甘  
澤謠東坡以其天竺故事書以遺天竺寺僧因刪舊  
文之煩冗者爲圓澤傳

江水又東經龍盤石

水經注曰江水東經石龍至博陽二村廣四百丈長六里而復始于岨塞江川夏沒冬出基亘通渚

江水又東經百小灘

水經注曰江水東逕羊腸虎臂灘楊亮爲益州刺史至此舟覆愆其波瀾蜀人名之爲使君灘寰宇記曰使君灘在萬縣東二里類書曰在雲陽縣西

長年云石竇繁紅巖磧西界沱石鼓峽永安沱魚風渡武寧關雙渠林磨刀灘渚望林仰渡灘葫蘆磧石壩磧挿柳灘攢茅林冷水磧新沱大湖灘白水溪小

湖灘長防林窄小林橐石明鏡灘眠石腦戟眉磧黃  
金灘萬縣共九十里中灘礪砂磧草盤石浮圖磧道  
人灘李牌溪攢石壩周溪龍盤石原灘巴陽峽百小  
灘九堆林白鶴灘飛纜林小江口共九十里按大湖  
灘著名之險也黑虎極險石鼓雙渠磨刀橐石明鏡  
窄小席佛面黃泥子高桅子猴子石次險

江水又東經小江口受彭水彭水源出霧山東受濁江  
濁江源出青岡山東經渠口鋪入彭彭水又東受桃溪  
桃溪源出大東陂經火焰壩受梓水梓水源出太平山

東入桃桃溪又東經臨江市入彭彭水又東北經開縣城南受清水清水源出石塔山西南經石門又南經龍馬洞又西南受白水白水源出巖飛山西南入清清水又西南受三潮溪三潮溪源出溫湯峽之積正洞西流爲檀井溪入清清水又南經開縣城東入彭彭水又東南受網鹿溪又南經小江口入江

龍馬洞方廣二畝門高一丈內一石塔高丈許石座高七尺石傘罩之又二石龍頭角崢嶸牙爪奮怒一石砬挺立一石鼓擊之鏗然有聲上有瓊珞下垂如



流珠狀者數百舒卷不一形像巧於鐫刻石壁下有井方一丈深不可測有馬蹄跡自井中出入錯雜稍北又有洞門高七尺許火炬照之可行三四里卽滅唐書曰萬歲縣東南五里有靈洞貞元九年雷雨震開水經注曰彭水出巴渠縣獠中東南流逕漢豐縣東清水注之清水源出西北巴渠縣東北巴嶺獠中卽巴渠水也西南流至其縣又西入峽檀井溪水出焉又西出峽至漢豐縣東而西注彭水謂之清水口彭溪水又南經胸臆縣西六十里南流注於江謂之

彭溪口

開縣故胸臆地也漢建安二十一年分置漢豐縣屬巴東郡宋永初中分置巴渠縣後魏分置漢興縣俱屬巴東郡西魏恭帝三年置開州及江會郡又改漢興爲西流漢豐爲永寧周天和元年置周安郡治永寧省江會郡入之又置萬安郡治巴渠改巴渠爲萬世縣建德五年廢開江以西流屬周安郡隋開皇罷郡置開州十八年改永寧爲盛山縣大業二年廢州以盛山屬巴東郡萬世屬萬安郡西流屬通州郡義

寧二年改萬安爲萬世郡唐武德元年改置開州貞  
觀元年省西流入盛山二十三年改萬世爲萬歲天  
寶改州爲盛山郡乾元復故屬山南東道廣德元年  
改盛山爲開江宋爲開州盛山郡屬夔州路元豐中  
改萬歲爲清水縣元省清水入開江明洪武四年省  
開江入州七年改縣○縣北有盛山唐韋處厚知開  
州有盛山十二景詩宿雲亭隱月岫流杯池琵琶臺  
盤磴葫蘆沼繡衣石瓶泉井梅溪桃塢茶嶺竹巖應  
而和者十人韓文公爲之序其集闕下者六人元稹

許康佐白居易李景儉嚴謨溫造也縣西有九龍山  
石楠垂雲玉環凝香飛虹啼猿磨嵯飛仙青楓共九  
峯○縣東北六十里有清水故城西南九十里有新  
浦故城西北五十里有西流故城

江水又東經燕子龕

亦名下巖唐王摩詰所謂山中燕子龕路劇羊腸惡  
宋范石湖所謂下巖風景亦高寒者巖石一片豁然  
洞開僧人卽洞爲龕鑿諸佛像以招四方船客之布  
施名士亦往往留題焉黃魯直曰唐末有劉道者自

鑿石龕曰元便藏龕中不用日時門人奉其命二百年來遊者題詩不可勝讀莫能起此開巖者故予表見之

江水又東經馬嶺灘

灘上卽萬戶驛下有黃石板卽李仁甫所謂橫石灘也水經注曰江水又東右逕胸臆縣故城南縣在巴東郡西二百九十里縣治故城踰其山陂南臨大江之岸有方山山形方峭枕側江濱紀勝曰胸臆縣在萬戶城西李燾胸臆記曰余泊舟雲安之西三十里

萬戶驛下橫石灘上土人云驛之左右則胸臆故城也愚按馬嶺距縣城四十里岸石壁立數百仞其狀如馬故名上有平田數百頃陸道所經雖城迹已湮猶有城垣之勢自西界沱而下江岸坦濶無如此者古人設城有以也漢扶嘉邑人爲高祖獻定三秦策臨終有言三牛對馬嶺不出貴人出鹽井所謂馬嶺者當卽此處蓋言縣城形勢也俗謂三牛馬嶺二山皆近鹽井謬矣又李燾胸臆記曰漢志巴郡有胸臆縣顏師古注胸音劬杜君卿通典乃作胸臆胸音蠡

腮如尹切與師古特異許叔重說文胸脯腮也其俱切無他義胸腮蟲名漢中有胸腮縣地多此蟲因以爲名胸如願切腮人尹切讀如閭君卿蓋從叔重而小不同然叔重謂胸腮屬漢中誤矣類篇承叔重之誤旣以胸腮屬漢中別於腮字下注胸腮屬巴郡則又承師古之誤遍檢地志漢中實無胸腮固當以君卿爲主然胸當作胸不當作胸君卿猶未及辨考職方者宜辨之愚按胸腮蚯蚓也唐韻音蠡潤劉禹錫音屈忍六書故音蠡忍問奇集音瞿潤從句者當音

劬從旬者當音蠡音韻各從其類惟屈音不可通也  
舊疑此物在在有之何得巴郡獨以名縣乾隆四十  
九年五月十五日晨起輿行此山蚯蚓塞途幾無隙  
地爲行人踐踏斃僵道側者不知其數問之土人云  
暑月常有之天明則出日高則蟄未知所從往來考  
范石湖詩注亦曰峽中蚯蚓之盛無如雲安江濱濱  
壤戢戢無際然則古人命名有以也

江水又東經雲陽縣城南

江中有龍脊石名勝記曰形如遊龍歲人日邑人遊



其上以雞子卜歲豐凶古諺云龍床如拭濟舟必吉  
龍床彷彿濟舟必沒

雲陽縣故朐朐縣也漢置屬巴郡宋永初中分置新  
浦縣周天和元年改開江爲江會郡治新浦又改朐  
朐爲雲安縣建德五年廢江會郡以新浦屬固安郡  
隋大業三年新浦雲安俱屬巴東郡宋開寶六年置  
雲安軍領雲安縣雲安監熙寧四年改監爲安義縣  
省新浦入開江八年復爲監宋末軍廢元至元十五  
年復置二十年改州明洪武七年改縣○按漢雲陽

縣屬左馮翊卽今陝西涇陽縣又會稽郡曲阿縣故雲陽皆非今之雲陽也

江水又東受湯溪湯溪源出太平縣東南萬頃池西流爲岔水又西南受溪溪又南受紅沙溪又南受進浦溪又南受小溪又南受鹽渠溪又南受南溪南溪源出寒池爲太陽河又會青巖溪磨刀溪西南入湯湯溪又南經鹽井又南受洞口溪又南入江

水經注曰鹽井一百餘所巴州資以自給粒大者方寸中央隆起形如張傘故名傘子鹽有不成者形亦

必方異於常鹽矣王隱晉書地道記謂入湯口四十  
里有石煮以爲鹽大者如升小者如拳煮之水竭鹽  
成蓋蜀火井之倫水火相得乃佳耳今大井寬丈餘  
深二尺煎者數十人晝夜汲之可得鹽數千觔相傳  
漢高祖時扶嘉所開數千年來水源不竭而鹽脉不  
縮也鹽成小粒而不方與古稍異水經注曰湯溪水  
源出縣北六百餘里上庸界南流歷縣翼帶鹽井一  
百所下與檀溪水合水上承巴渠水南歷檀井溪謂  
之檀井水下入湯水湯水又南入於江名曰湯口寔

宇記曰千頃池水通西南流爲雲陽縣湯水西陽雜  
俎曰雲安井自大江泝別派凡三十里近井十五里  
澄清如鏡舟楫無虞近江十五里皆灘石險惡天師  
翟法言字乾祐召羣龍使平之一夕風雷震擊盡爲  
平潭惟一灘仍舊天師復勅神吏追之三日一女子  
至曰某所以不來者欲助天師廣濟物之功也雲安  
貧民自江負債以給衣食者衆矣今若輕舟利涉平  
波無虞卽貧民無傭負之所絕衣食之源余寧險灘  
波以贍傭負不能利舟楫以安富商也乾祐善其言

使諸龍皆復其故風雲頃刻長灘如舊

江水又東受新軍水新軍水源出石砭廳東有二源南爲九龍溝北爲官渡河東經龍潭壩合流東經灌子山北經龍角腦受東喬水又北經新軍口入江

江水又東北經東陽灘

水經注曰東陽灘江上有破石謂之破石灘荀延光沒處按東陽廟基磁庄三灘不過十里往往爲行舟畏途然夏漲之險在東陽冬涸之險在磁庄

江水又東北受古林水古林水源出奉節縣南龍駒九

港二水合流北入江

南岸數小峯如陵古林卽故陵之訛也水經注曰逕  
魚復縣之故陵舊郡治故陵西二里之故陵村溪卽  
永谷也又東爲落牛灘逕故陵北江側有六大墳又  
東爲落牛灘逕故陵北庾仲雍曰楚師丹陽所葬亦  
猶枳之巴陵矣故以故陵爲名也江之左岸有巴鄉  
村村側有溪溪水伏流逕平頭山內通南浦故縣  
江水又東北經龍洞溪龍洞溪源出奉節縣西北白海  
壩南流入江

水經注謂右逕夜清而東歷朝陽道口也

長年云小江口痴灘長磧上巖盤沱燕子龕黃連溪  
夫子礪羅船碕拖逗林小站大站馬嶺林馬糞沱黃  
石板馬口塔江林玉沱二郎灘雲陽縣其九十里雞  
肥林寶塔沱新軍灘青草灘東陽林石龜沱三陽關  
廟磯石板灘磁庄龍洞南沱拖板溪其九十里按馬  
嶺磁庄二灘著名之險也塔江寶塔最險馬糞廟磯  
東陽極險盤沱二郎青草次險

江水又東北經安平驛

水經注所謂新市里也對岸有溪是陽元水水經注  
曰水出陽口縣西南高陽山東東北流逕其縣南東  
北流雨水注之水發縣東南柏枝山山下有兩穴其  
水北流入高陽溪之水又東北流注於江謂之陽元  
口寰宇記曰梁置陽口縣蓋在今州西陽水口後魏  
廢帝三年移巴郡理此

江水又東受西瀼水

寰宇記曰千頃池在大昌縣西三百六十里波瀾浩  
渺莫測涯際分爲三道一道東流大昌縣爲井源一



道西流爲雲安縣湯溪一道南流奉節縣爲西瀘水  
按萬頃池在太平縣東三百里峽口山之南幽谷溪  
菁瀦爲池水流分四道

江水又東經夔州府城南

夔州府故庸國之魚邑也楚伐庸裨僚魚人實逐之  
秦置魚復縣屬巴郡漢置江關都尉初平元年劉璋  
分置固陵郡建安六年改固陵爲巴東郡屬益州蜀  
漢章武元年改魚復爲永安縣晉太康元年復爲魚  
復二年以郡屬梁州太安二年遷爲益州永和初改

屬荊州宋秦始五年置三巴校尉尋廢齊建元二年  
置巴州永明元年州廢梁普通四年置信州又分置  
陽口縣後魏廢帝三年移郡治陽口周明帝二年還  
治魚復改巴東爲永安郡隋開皇三年廢郡省陽口  
入魚復大業元年廢州爲巴東郡唐武德元年復爲  
信州二年改夔州七年置都督府督黔巫一十九郡  
貞觀二十三年改魚復爲奉節縣天寶元年改夔州  
爲雲安郡罷都督乾元初復爲州稱防禦使屬山南  
東道天祐三年改鎮江軍後唐天成二年改寧江軍

宋爲夔州雲安郡開寶六年分置峽西路咸平四年  
改夔州路明洪武四年改府九年改州省奉節入之  
屬重慶府十四年改府復置奉節縣○漢章武二年  
先主爲陸遜所敗還白帝改魚復爲永安宮居之卽  
諸葛受遺處今府學是也甘夫人墓在府治內明成  
化間郡守吳晟築土爲臺有元至正十一年敎授陳  
嗣源碑文然甘夫人係沛人先主居小沛時娶爲妾  
生後主長坂之難賴趙雲保護得免卒葬南郡章武  
二年追諡皇恩夫人後主改諡昭烈皇后迎柩至蜀

與先主合葬則夫人之墓不應在永安後人附會也  
俗謂夫人死於長坂之難蓋沿小說而悞○城內無  
井孔明引城北三岔溪之水入城宋紹興中郡守張  
稅改用瓦筒甃三井瀦之曰惠民井乾道間郡守王  
十朋因權水錢病民罷之明嘉靖中郡守張廷柏復  
引溪水入城注以十池曰利民文德武功化龍漾翠  
通濟注香楊清太平留澗也民賴其利呼爲張公井  
今湮廢矣

江水又東經八陣圖

水經注曰石磧平曠望兼川陸有諸葛亮所造入陣  
圖東踰故壘皆累細石爲之自壘西去聚石八行行  
間相去二丈因曰入陣旣成自今行師庶不覆敗皆  
圖兵勢行藏之權自後漢識者所不能了今夏水漂  
蕩歲月消損高處可二三尺下處磨滅殆盡荊州圖  
記曰永安宮南一里渚下平磧上有孔明入陣圖聚  
細石爲之各高五尺廣十圍歷然棊布縱橫相當中  
間相去九尺正中開南北巷悉廣五尺共六十四聚  
或爲人散亂及爲夏水所沒冬水退後如故晉書桓

溫傳曰初亮造八陣圖於魚復平沙之上壘石爲八  
行行相去二丈溫伐蜀經之曰此常山蛇勢也嘉話  
錄曰八陣圖聚石分布峽水大時頃湧漫漾大木十  
圍枯槎一百丈隨波而下及水落川平萬物失故獨  
諸葛小石之堆標聚行列依然如是者六百年不動  
東坡文集曰自山俯視百餘丈凡八行爲六十四苑  
正圓不見凹凸如日中蓋影及就視皆卵石漫漫不  
可辨薛永嘉曰因江爲勢積石憑流前蔽壁門後依  
却月縱橫皆八魁間二丈偃月內面九六鱗差七八

以爲經九六以爲緯體方形圓可以觀營陣之勢可以識奇正之形驛程記曰魚復浦磧上觀八陣圖所謂六十四陣如碁盤二十四陣如偃月不甚可辨蔡氏謂八陣生於方圓方者坤圓者乾或謂風后因井田法以立兵制武侯得之布之魚復壘名同實異不可知也愚按八陣者天地風雲龍虎鳥蛇也回旋九攢以象天居西北之乾四平正列以象地居西南之坤散渙邪直以象風居東南之巽前大後銳以象雲居東北之艮四者陣之正也延袤綿亘以象龍居東

方之陣前合後開以象虎居西方之兌彌漫散合以象鳥居南方之離回屈包裹以象蛇居北方之坎四者陣之奇也四正四奇各以小陣相從或四正七陣四奇五陣大將居其中握四奇之中四陣爲餘奇別爲游騎二十四陣以擊入陣之後聽音望魔出入無常謂之疑兵此八陣化爲七十二陣也天有二衡各四隊地有二軸各三隊天地之前後有衝天衝前後各二隊爲四隊地衝合前後各三隊爲六隊風雲左右各二隊前衝爲虎後衝爲龍風之兩端爲蛇雲之



兩端爲鳥此八陣化爲七十二隊也或化爲三十四陣或化爲二十四陣八十一陣一百二十陣二百五十陣又或化爲三才陣五行陣六花陣又或演爲天覆地載風揚雲垂龍飛虎翼蛇蟠鳥翔之八變又或演天度之三百六十四變

江水又東經鹽泉井

井水泛沙而出夏沒冬見其味鹹俗呼臭鹽磧寰宇記曰八陣圖下東南三里有一磧東西百步南北四十步磧上有鹽井五口以木爲桶昔常取鹽近時沙

壅勝覽曰鹽泉有綖篲引泉踏溪每一纒用一篲歲  
十月旦以新易陳有司作樂以臨之井民相慶謂之  
綖篲

江水又東受清瀼水清瀼水源出縣北長松嶺南受磨  
臺山之天池水又南受清溪又南逕赤甲白鹽二山又  
東受戚靜山之水又南入江

紀勝曰公孫述于東瀼水濱稻田因號東屯稻田畦  
延袤可得百許頃前帶清溪後枕崇岡樹不蔥蒨氣  
象深秀有杜子美宅在焉陸游高齋記曰少陵先生

晚遊夔州三徙居皆名高齋質於其詩曰次水門者  
白帝城之高齋也依藥餌者漢西之高齋也見一川  
者東屯之高齋也故其詩又曰高齋非一處今白帝  
廢爲邱墟漢西裂爲坊市不可識獨東屯有李氏者  
居已數世上距少陵纔三易主唐大厯初故劬猶存  
勝覽曰世傳計臺乃少陵故居或謂渝州趙稔宅碑  
目曰少陵遊蜀凡八稔在夔獨三年平生所賦詩凡  
千四百六十篇而夔乃三百六十有一治平中知州  
賈昌言刻十二石於北園歲久字漫建中靖國元年

運判王蓮新爲十碑

江水又東經白帝城

漢魚復縣故城也公孫述至魚復有白龍出井因號  
白帝城荊州圖經謂城西臨大江東南高二百丈西  
北高一千丈焉城西有木如柱大十圍高三丈世傳  
爲公孫述樓柱斫之出血枯而不朽蓋數千年物精  
靈存焉張琬白帝廟辨誣記曰更始二年公孫氏自  
立爲蜀王明年夏四月稱帝改元龍興是歲漢世祖  
以蕭王卽位公孫初不得罪于漢而盡有益州地子

養一方十有三年於蜀不得爲無功臨陣隕命與國  
俱亡可謂賢矣光武賜書且曰君非吾亂臣賊子則  
蒙僭亂之名者失考甚矣楊安誠白帝廟詩序曰公  
孫氏享國日淺轍迹未嘗至夔無從廟食水經注瞿  
塘灘上神廟甚靈刺史二千石過其下不敢伐鼓鳴  
角恐致風雨舟人以布裹篙足不令觸石有聲不謂  
公孫氏也瞿塘天下至險必有神司之廟連白帝城  
俗遂從而訛爾李貽孫都督府記曰白帝城東南斗  
上二百七十步得白帝廟又有越公堂在廟南少西

隋楊素建奇構隆敞內無撐柱雙視中脊邈不可度  
五道甲子無土木之隙王漁洋登白帝城記曰臥龍  
山上女牆卽子陽城其下爲下關城稍折而南爲白  
帝城二城犬牙相連枕白帝山石垣繚繞上極青冥  
水經所云白帝北緣馬嶺接赤甲山其間平處南北  
相去八十五丈東西七十丈東傍溪溪卽以爲隍西  
南臨大江瞰之眩目者也然入蜀記謂瞿塘關唐故  
夔州與白帝相連關西門正對灩澦堆則臨瞿塘者  
當是唐之夔州非白帝矣羊腸數轉始達絕頂正俯

瞿塘兩巖澗瀕石在其西孤峙江面按古夔州治本  
在白帝城公孫述據蜀所築漢建安十八年諸葛亮  
自荊州沂流定白帝章武二年昭烈征吳敗還駐白  
帝晉義熙元年譙縱據蜀以弟明屯白帝西魏恭帝  
三年李遷哲討破信州蠻因留鎮白帝自後周天和  
中陸騰平蠻始於故宮城南八陣灘北臨江築城而  
移州治之卽今理所謂漢西治也後周建德五年總  
管王述登白帝歎曰此奇勝可居復還白帝宋景德  
三年轉運使丁謂薛顏還今治漢西淳祐二年復移

白帝元至元二十二年還今治陸放翁謂此白帝頗  
平曠然失險無復形勢蓋由承平之世文吏憚於跋  
跬商民艱於負戴故也因思余玠城雲山釣魚山有  
以哉

江水又東經澗瀨堆

碎石堆積而成突出江心若青螺在鏡中宋淳熙中  
成鑄遣人撐舟垂繩縋石量澗瀨水約八十四丈夏  
漲堆上水猶三十餘丈范石湖詩謂水漫其頂渦紋  
漫瀨謂之澗瀨散髮天下至險之地然水僅漫頂尙



非極漲者矣水經注曰江中有孤石爲豔預石冬出水二十餘丈夏則沒亦有裁出處十道記曰淫豫石與城郭門石潛通蜀人往燒火伏石則淫豫邊沸袁宇記曰灩澦堆周圍二十餘丈在夔州江心中瞿塘峽口冬水淺屹然露百餘丈夏水漲沒數十丈土人云方夏秋水漲時又高於堆數十丈昔歲旱石露大半有三足形如鼎東坡賦序曰灩澦堆爲天下之至險覆舟者皆歸咎此石以余觀之殆有功於斯人者蜀江會百水而至於夔瀾漫浩汗橫放於大野而峽

之小大曾不及其十一苟先無以齟齬于其間則江  
之遠來奔騰迅快盡銳于瞿唐之口其險悍可畏當  
不啻於今耳愚按水經注作淫預坤元錄作允豫孝  
子傳作艷與寰宇記作猶豫樂府云灩澦大如象瞿  
塘不可上灩澦大如馬瞿塘不可下灩澦大如牛瞿  
塘不可流南史梁簡文詩云艷澦大如襍瞿塘不敢  
觸類要云淫預大如鼉瞿塘行舟絕淫預大如龜瞿  
塘不可窺凡言大者狀其小也國史補謂四月五月  
尤險行者歌之冬水淺露高數十丈豈象馬可擬舟

人候水此爲水則也

江水又東經瞿塘峽

神禹鑿通江流古捍關也秋冬水落爲瞿春夏水溢爲塘兩巖對峙中貫一江而灩澦當其口舊名西陵而湖北宜昌東湖縣之西亦有西陵峽杜詩楚峽混殊名相沿久矣水經謂廣谿峽者是也隋楊素設關於此關在赤甲城後移大江南岸與白帝城基相對唐天祐元年蜀王建將章武請作鐵組絕江中流立柵兩端謂之鎖峽宋景定五年守將徐宗武置鐵二

根各高六尺五寸鐵索七條長二百七十七丈五尺  
共五千一十股用以攔江謂之鐵鎖關明玉珍又鑿  
壁引繩作飛橋以禦明師今壁間尙有鑿孔自下而  
上如梯俗稱孟梁梯水經注曰斯乃三峽之首其間  
三十里頽巖倚木厥勢殆交峽中有瞿塘黃龕二灘  
夏水洄復沿沂所忌入蜀記曰瞿塘峽兩壁對聳上  
入霄漢其中如削成仰視天如疋練然水已落峽中  
平如油盎吳船錄曰峽中兩岸高巖峻壁斧鑿之痕  
李重扞關銘序曰楚肅四年始建扞關突在魚復置

江關都尉以魚復設尉治東漢省尉而關如故東漢置有扞水扞關不言都尉也秦張儀說楚謂下水而浮不十日而距扞關蜀李雄說公孫述謂東守巴郡拒扞關之口皆指此酈道元水經注謂扞關廩君所置章懷范史注謂扞關故基在夷陵巴山縣二說非也入蜀記曰瞿塘峽有聖姥泉石上一罇人呼於亭則泉出屢呼則屢出愚按青城之泉六時裁眉之水二色夔峽石上人呼則流羊角灘頭人噪則沸臨邛化火犍爲化油巫峽煮茶蜀江濯錦皆蜀水之異也

夫陰陽之變化何所不有泉水冬溫夏冷海水下淡上鹹止水性沈流水性浮滂則水重旱則水輕揚泛之水勞銅壺之水滑境異情遷雖水亦有然矣

江水又東經赤甲白鹽山

水經注謂赤甲山不生草木山石皆赤如人袒胛故爲赤甲山或謂漢取巴人爲赤甲軍屯兵處其峽江對峙有白鹽山高可千餘丈色如白鹽俯臨神淵天旱燃火擲灰以穢淵中往往得雨二山蜀之咽喉也宋張璠大書赤甲白鹽四字於其上寰宇記曰赤甲

城是舊魚復縣故基

江水又東經黃嵌灘

水經之黃龕灘也

江水又東經黑石灘

范石湖瞿塘行曰黑石黃嵌拚命輕二灘皆峽中至險處

長年云拖板溪朽石沱青灘要和尙安平驛迷魂林  
鰻鰻三沱烏龍沱南鄉峽合水林高昌磧白巖馬湖  
灘黃葛嘴官渡口奉節縣共九十里新開灘銅錢堆

焦石入陣圖青鹽井瞿塘峽白帝城滪頭石鐵柱溪  
石鼻子男女孔擂鼓臺赤甲山白鹽山孟梁梯粉壁  
堂臺閣林黃汧風雨峽巴灘毛沱黑石灘白骨碛猫  
兒頭餓虎灘大溪口共六十里按瞿塘滪頭黑石石  
板四灘著名之險也青巖三沱最險鐵柱溪男女孔  
老碼灘八母子白馬灘餓鬼灘次險按報部險灘與  
與長年所述多不相符皆由稱謂之殊難以詳辨舟  
游者隨時咨訪而慎之可也